

Naqqiut

Saqqummiussissut 15. august 2019-imeersoq taarserpaa
(Oqaatsinik atorneqartunik iluarsiiisoqarpoq)

**Uunga siunnersuut: Tapersiissutitalimmik inissialiortiternermut
taarsigassarsititsisarneq pillugu Inatsisartut inatsisaat nr. xx, xx. xxx 2019-imeersoq**
(Ineqarnermut Attaveqaqatigiinnermullu Naalakkersuisoq)

Saqqummiussissut

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Matumuuna Naalakkersuisut sinnerlugit tapersiissutitalimmik inissialiortiternermut taarsigassarsititsisarneq pillugu Inatsisartut inatsisissaattut siunnersuut saqqummiuppara.

Isertitat sumilu najugaqarneq apeqqutaatillugit inissiamik nammineerluni pigisassamik pissarsisinnaanermut periarfissat assigiinngitsorujussuunerat Naalakkersuisunit eqqumaffigineqarpoq. Innuttaasut namminneerlutik inissianik imminnut pilersornissaannut periarfissaat ajornannginnerussapput pilerinarnerussallutillu.

Tapersiissutitalimmik inissialiortiternermut inatsit naapertorlugu taarsigassarsiarititaareersut inatsisit assigiinngitsut paasiuminaassinnaasut malillugit taarsigassarsiarititaapput.

Taamaattumik Naalakkersuisut ineqarnermik aaqquissusseqqinnermut ilagitillugu inatsisit pisariinnerulersippaat, taamaalillunilu taarsigassarsititsisarnermi suliat aqunneqartarnerat paasiuminarnerulissaaq.

Siunnersuut tapersiissutitalimmik inissialiortiternermut inatsit naapertorlugu taarsigassarsiat pioreersut aqunneqarnerinut akilersorneqarnerinullu inatsisitigut sinaakkusiisussaavoq. Siunnersuuteqarnerup kingunerisaanik Naalakkersuisut inissianik, tapersiissutitalimmik inissialiortiternermut inatsisit atuuttuusimasut naapertorlugit taarsigassarsiviusimasunik sananermut, pisinermut, iluarsaassinermut, alliliinermut pitsanngorsaanermulluunniit tapiissuteqarsinnaajunnaassapput nutaanilluunniit taarsigassarsititsisinnaajunnaassallutik.

Siunnersuut inissianik aningaasalersuisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuummut, aammattaaq ukiakkut ataatsimiinnermi matumani saqqummiunneqartumut atasutut isigineqassaaq. Taamaalilluni kommunit tapersiissutitalimmik illuliat maanna atuuttut atuuttuusimasullu iluarsaannissaannut, allilernissaannut pitsanngorsarnissaannullu tapiissuteqartalernissaannut inatsisitigut tunngavissamik ilanngussisoqassasoq siunnersuutigineqarpoq.

Aamma 2020-mut Aningaasanut Inatsisissatut Siunnersuutissamut Kalaallit Nunaanni Namminersorlutik Oqartussat tapersiissutitalimmik illuliat maanna atuuttut atuuttuusimasullu iluarsaannissaannut, allilernissaannut pitsanngorsarnissaannullu maannamut tapiissutigisartagaasa kommunitut nuunneqarnissaat pillugu siunnersuummik saqqummiussisoqarpoq.

Nutaatut Kalaallit Nunaanni Namminersorlutik Oqartussat aamma taarsigassarsisup akornanni aningaasatigut aaqqitassanik naatsorsuineri inissiap tuniniarneqarnermini nalingata tunngavigineqartarnissaa siunnersuutigineqarpoq. Siunnersuummi inissialionermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaanni nr. 11, 19. november 2007-imeersumi § 33-p allannguutaanut, 2019-imut Aningaasanut Inatsimmi kontomi pingaarnermi 20.30.07-imut oqaasertaliussaq nr. 2-mi atuutsinneqalersumut naleqqussaasoqarpoq.

Aamma nutaatut Kalaallit Nunaanni Namminersorlutik Oqartussat iluanaarutissaasa inernerinik annikilliliisarnissaq siunnersuutigineqarpoq. Taarsigassarsisup iluanaarutissai tunniullugit akilerneqartassapput. Taamaalilluni taarsigassarsiat matuneqassapput. Kalaallit Nunaanni Namminersorlutik Oqartussat taarsigassarsianut akiliisitsiniaassanngillat aqutsinatilluunniit, taarsigassarsisorlu nutaamik aallarteqqissinnaalissaaq.

Nutaatut inissiamik utertitamik arsaarinnissummilluunniit tunisinermi niuernermi naliusoq, taamaattorli minnerpaamik inissiap teknikkimut aningaasaqarnermullu nalinga atorneqassaaq. Kisiannili kommunimut tunisinermi pisineri akiusoq illuatungeriinnit isumaqatigiissutigineqarsinnaavoq. Siunnersuut Inatsisartut Sanaartornermut Ataatsimiititaliaata Inatsisartut 2018-imi Ukiaanerani Ataatsimiinneranni immikkoortup 2017-ip, sanaqateqarluni illulianut taarsigassarsititsisarneq pillugu Inatsisartut inatsisaannut tunngasup pingajussaanneerneqarnissaanut isumaliutissiissutaata malitsigaa.

Illuliortiternernut aningaasalersuineq pillugu inatsit aamma piginneqatigiilluni inissiat pillugu inatsit assigalugit taarsigassarsisut taarsigassarsianut ernialinnut, akiliutinut tapiissutitaqartinneqartunut piffissaq sioqqullugu akiliinissamut periarfissinneqarnissaat siunnersuutigineqarpoq. Siunnersuummi taarsigassarsiat ingerlasut aamma allannguineri taarsigassarsiat akiliutinut tapiissutitaqartinneqartut pineqarput.

Piffissaq sioqqullugu akiliinermi akiitsut sinneri 30 procentinik, taarsigassarsiat nalinginnaasumik akilersorneqarnerini akiliutinut Kalaallit Nunaanni Namminersorlutik Oqartussat tapiissutaasa amerlaqataannik nalikillissinneqassapput. Tamatuma kingorna taarsigassarsiaaqaartut nalikillissat piffissamut taarsigassarsiat akilersorneqarfissaannut sinneruttumut ukiumut 6 procentit utertinneqassapput.

Nammineerluni illulianut taarsigassarsianut aamma sanaqateqarluni illulianut taarsigassarsianut erniaqanngitsunut akilersugassaannngitsunullu ingerlasunut piffissaq appartikkiartuaarfissap ukiunik 33-niit ukiunut 20-nut sivikillineqarnissaa siunneersuutigineqarpoq. Piffissap appartikkiartuaartitsivissap sinnera 20/33 tunngavigalugu amerlaqatigiinnik appartinneqassaaq, ukiumullu ilivitsumut qaninnermut akunnaallisarneqassalluni. Assersuutigalugu ukiut 20-t ukiunut 12-inut sivikillineqassapput. Tamatuma kingorna akiitsut sinneri piffissamut appaaviusussamut annertoqatigiinngorlugit appartikkiartuaarneqassapput.

Taarsigassarsinermi suliat assigiinngitsut taarsigassarsisumut aammalu taarsigassarsinermi sulianik aqutsisunut sapinngisamik paasinarsarnissaat, taamaalillunilu kukkunerit pinngitsoortinneqarnissaat Naalackersuisunit anguniarneqarpoq.

Taamatut oqaaseqarlunga Naalackersuisut sinnerlugit immikkoortoq Inatsisartuni suliassanngorlugu tunniuppara.